



SAOPŠTENJE ZA JAVNOST

Informacije u vezi istrage zbog osnova sumnje u izvršenje krivičnih djela Trgovine djecom i Zapuštanja ili zlostavljanja djeteta

(Brčko, 27.02.2025. godine)

U toku današnjeg dana, Policija Brčko distrikta BiH je u prostorije Tužilaštva Brčko distrikta BiH dovela ukupno osam (8) lica koja su lišena slobode u prethodna dva dana.

Od naprijed navedenog broj lica, postupajuća tužiteljica je u toku dana saslušala tri (3) lica koja su lišena slobode, dana 25.02.2025.godine, zbog postojanja osnova sumnje da su izvršili krivično djelo „Trgovina djecom“ iz člana 207b i krivično djela “Zapuštanje ili zlostavljanje djeteta” iz člana 216 u vezi sa članom 31. Krivičnog zakona Brčko distrikta BiH.

Nakon izvršenog ispitivanja, postupajuća tužiteljica je podnijela prijedlog za određivanje mjere pritvora za tri (3) osumnjičena lica pred nadležnim Osnovnim sudom Brčko distrikta BiH.

Prijedlog za određivanje mjere pritvora temelji se na postojanju okolnosti i razloga iz člana 132. stav 1) pod tačkama b), c) i d) Zakona o krivičnom postupku Brčko distrikta BiH, odnosno zbog:

- b) postojanja osnovane bojazani da će ispitana lica uništiti, sakriti, izmijeniti ili krivotvoriti dokaze ili tragove važne za krivični postupak ili ako naročite okolnosti ukazuju da će ometati krivični postupak uticajem na svjedoke, saučesnike ili prikrivače,
- c) postojanja okolnosti da će ista lica ponoviti krivično djelo ili da će dovršiti pokušano krivično djelo, a za ta krivična djela može se izreći kazna zatvora tri godine ili teža kazna,
- d) te zbog činjenice da se radi o krivičnom djelu za koje se može izreći kazna zatvora deset godina ili teža kazna, a koje je posebno teško s obzirom na način izvršenja ili posljedice krivičnog djela.

Osnovni sud Brčko distrikta BiH je dužan u roku od 24 sata održati ročište na kome će odlučiti o predloženom pritvoru.

U skladu sa odredbama Krivičnog zakona Brčko distrikta BiH, zapijećena kazna za učinjenje krivičnog djela iz člana 207b stav 1) je kazna zatvora od najmanje 10 godina, dok je za učinjenje krivičnog djela iz člana 216 stav 1) zaprijećena kazna zatvora do 3 godine.

Ostalih pet (5) lica koja su lišena slobode, dana 26.02.2025.godine, biti će izvedena pred tužiteljicu u toku sutrašnjeg dana, te postupajuća tužiteljica će u roku od naredna 24 sata odlučiti da li će predlagati mjeru pritvora za preostala lica.

U daljem toku postupka, istražne aktivnosti se nastavljaju nesmanjenim intenzitetom, a javnost će biti informisana o važnim informacijama u obimu koji ne šteti istrazi.

Opreza radi, imajući u vidu zakonske odredbe kod postupanja u krivičnim predmetima protiv učinilaca krivičnih djela na štetu djece i maloljetnika, ali i univerzalna prava djeteta, ponovo podsjećamo na obavezu posebno obazrivog postupanja u ovom slučaju.

****Ovom objavom ne prejuducira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.****

**VRŠILAC DUŽNOSTI
GLAVNOG TUŽIOCA
RADMILO IVANOVIĆ**